

# DOMENIE XIX «VIE PAL AN»

## Jutoris pe liturgjie

Domenie, ai 09 di Avost dal 2020

*Alore Gjesù ur vierzè la ment par lâ a font des Scrituris* (Lc. 24, 45)

**Vite - Bibie - Popul**

pre Antoni Beline e une sô opinion di îr - par fânus rifleti vuê

### ***Jo ti dîs: Tu tu sês Pieri e su cheste pierre***

La glesie partant no je fondade su la persone di Pieri, senò e sarès colade subit dopo, ma su la fede di Pieri che e je e e reste un don di Diu. Là che e je fede si à glesie e là che e sparìs la fede e sparìs la glesie.

Ancje la peraule "pierre", come ch'al dîs l'aramaic, no je un clap ma Pieri, o, miôr, la sô fede. Cui isal alore il sucessôr di Pieri e duncje la pierre di fonde de glesie? No chel ch'al è sentât suntun clap o su la sente di Pieri ma chel che al à la gracie, se Diu je dà, di professâ la stesse fede in Crist. E cu la promesse di Crist, lis puartis des inferis no rivaran adore di copâ la fede su la tiere, ancje se par cumbinazion e ves di sparî la sente.

Chest nus dà une garanzie ben plui grande che no dutis lis infalibilitâts dal pape. Parcè che se la fonde de glesie e je la fede, fin che al sarà mont nol manjarà cualchidun che, di cualchi bande, al palesarà la grande rivelazion dal Pari: "Tu tu sês il Crist, il Fi dal Diu vîf" (v. 15). Une rivelazion personâl, no istituzionâl; che di fat chei altris apuestui no le àn vude, almancul in chel moment. E li e sarà la glesie, magari cence struturis ni timbris.

La fede no je dome une furtune in chest mont, ma e vierç lis puartis dal cîl e e dislee lis cjadenis dal mâl; cussì come la mancjance di fede ni ch'è vierç lis puartis dal cîl ni ch'è dislee lis cjadenis dal mâl.

*Furtunât il popul che al è il Signôr il so Diu - par une leture sapienziâl de Bibie, p. 184.*

\* \* \*

*Tal vanzeli di cheste domenie nus ven contât di une grande burascje sul lâc di Gjenezaret intant che i dissepui di Gjesù lu stavin traviersant in barcje. I esperts tes Sacris Scrituris a disin che e je intrigade di capî ce che al pò sedi sucedût in chê gnot di bisebove: dal sigûr un grant spachet e un event di salvece che nissun varès scrupulât. A zontin però che cheste burascje e platave-palesave lis dificolitâts de comunitât cristiane di Matieu li che adiriture e sarès stade metude a la prove la fede di Pieri. Di fat al començà a lâ sot aghe propit lui che il Signôr i veve dit: Tu tu sês Pieri e su cheste pierre o tirarai su la mê glesie (Mt 16, 18).*

*O podarèssin domandâsi: Se ancje pape Francesc, sucessôr di Pieri, al començàs a clopâ, dulà il cristian larajal a parâsi?*

*Se si fermìn a rifleti, lis burascjiis di vuê a son a no finî: chê dal Covid-19, dai cjamps dai profugos, dai migrants, de vuere, de miserie, de fan, des gnovis sclavitùts e in chestis zornadis ancje de tremende esplosion a Beirut tal Libano, cence contâ i alts e i bas te vite normâl de famee cul di nô, pe pandemie, mancjance di lavôr... A disin i perîts in economie e in salût publiche che tai mès a vignî al sbuerearà un aiarat di tampieste (Sal 107, 25) ancjemò plui fuart... nol è terrorisim, al è dome za olmâ in ce aghis che il barcjon si metarà.*

*Intant: jo mi cjatijo su la rive dal lâc a registrâ sul telefonin chei che si stan inneant o soio in plen tal burascje ancje jo?*

*Stojo tune bovadice personâl, ta chê de societât che mi cjati, o in chê dal dubi de fede, dal malstâ te glesie?*

*Tql lâc savoltât i dissepui a jerin, prime, cence la persone di Gjesù, dopo in face di Gjesù fantasme e daspò cun Gjesù su la barcje. Dulà sojo jo cul Signôr?*

*Cjatadis lis coordinadis de nestre posizion, fat il pont de situazion, o podìn cumò scrutinâ il vanzeli par imparâ alc - ? - dai dissepui, intant che o cirìn ancje noaltris soluzions te fede o cence fede, tal Signôr o cence.*

*Ma nus tocje vê fiducie; di fat o vin la furtune di savê che Gjesù al lè su la mont, fûr di man, a preâ.*

*Su la mont il Signôr al preave e in cîl al continue a preâ par ducj nô.*

*O podìn preparâsi ancje a lis sorpresis divinis e umanis de prime e seconde leture; il vanzeli al vares daspò di purtânus a une sincere, grande peraule personâl.*

*Smpri sperant che no si sedin sentâts calms e serens in rive al lâc par registrâ sul telefonin - masse spes in zornade di vuê - chei che a stan agonizant tes aghis de disperazion.*

### Antifone di jentrade

Cf. Sal 73,20.19.22.23

Ten fede, Signôr, a la tô aleance,  
no sta dismenteâti par simpri de vite dai tiei biâts.  
Jeve sù, Signôr, e pare la tô cause,  
no sta dismenteâ lis suplichis di chei che ti clamin.

Glorie a Diu

### Colete

Diu onipotent e eterni,  
che si permetin di clamâti cul non di Pari,  
colme tai nestris cûrs il spirt di fîs d'anime,  
par ch'o podin jentrâ a gjoldi l'ereditât imprometude.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

I Re 19, 9. 11-13

*Sta su la mont denant dal Signôr.*

*A disevin i vecjos: par chê strade che no si vûl lâ, si galope. E cussì i è sucedût ancje al profete Elie. La sô imagjine di Diu e jere chê dal aiaron che al spache i crets, dal taramot che al sdrume, dal fûc che al bruse dut. E invezit il Signôr si presentâ a lui tal sunsûr di un aiarin lizêr. Cambiade la imagjine di Diu? Sì.*

*Chest al vâl ancje par nô cuant che o cjalin a Crist che al è il litrat dal Diu invisibil / il Fi primarûl di dute la creazion (Co 1, 15).*

In chês zornadis rivât Elie a la mont di Diu l'Oreb, al jentrâ tun landri e al restâ dute la gnot. La peraule dal Signôr si fasè sintî cussì: "Salte fûr e sta su la mont denant dal Signôr". E ve che il Signôr al passà. Si sintì un grant burlaç, tant fuart che al scjassave lis monts e al spacave i crets denant dal Signôr, ma il Signôr nol jere tal burlaç. E daûr dal burlaç un taramot, ma il Signôr nol jere tal taramot; e dopo dal taramot un fûc, ma il Signôr nol jere tal fûc; e daûr dal fûc un sunsûr di un aiarin lizêr lizêr. A pene che Elie lu sintì, si taponâ la muse cu la manteline; al saltâ fûr e si fermâ su la jentrade dal landri.

### SALM RESPONSORIÂL

dal Salm 84

*Il salm, nus fâs smenteâ i spavents dal aiaron, dal taramot, dal fûc e nus ricuarde l'aiarin lizêr. La gnove muse di Diu nus cjacare di pâs, di salvece, di bontât, fedeltât, di justizie, di ogni ben. Muse che nus console, ma che e varâ consolât e rinfrancjât a la grande ancje il profete Elie,*

## **R. Danus, Signôr, la tô presince di pâs.**

*Se cjantât: Il cjant dai salms responsoriâi, p. 69.*

O vœi scoltâ ce che al dîs Diu;  
il Signôr sigûr di pâs al fevele pal so popul e pai siei fedêi,  
par chei che là di lui a tornin.  
Sigûr che la salvece e je dongje par chei che lu rispietin;  
la sô glorie e tornarà di cjase te nestre tiere. **R.**

Bontât e fedeltât si son stenzudis,  
justizie e pâs si son bussadis.  
La fedeltât e menarà sù de tiere  
e e cucarà jù dal cîl la justizie. **R.**

Di fat il Signôr nus darà ogni ben di sorte  
e e butarà il so prodot la nestre tiere.  
La justizie e cjamine denant di lui,  
e su l'olme dai siei pas la dretece. **R.**

## **SECONDE LETURE**

**Rm 9, 1-5**

**O bramarès di jessi maledît di Diu, taiât fûr di Crist pal ben dai miei fradis,**

*Chestis peraulis dal Apuestul a son par nô masse fuartis, tant che no rivin a capîlis; e se ancje capidîs, masse difîcilis di acetâ e di meti in pratiche. Al dîs Gandhi: Nissun al è dispot a murî pe proprie lenghe. E Simone Weile e zonte: Devant di un bon contribût ogni lenghe e culture a colin. O bramarès di jessi maludît... O vin ce diventâ ros come lis boris dal fûc.*

O dîs la veretât unît come che o soi a Crist; no dîs baussiis e la mê cussience mal conferme in union cul Spirtu Sant: o ài grant dolôr, un aviliment tal gno cûr che nol soste. Di fat o bramarès di jessi maledît di Diu, taiât fûr di Crist pal ben dai miei fradis, che a son de mê stesse gjernazie seont la cjar. Di fat lôr a son Israelîts, e je lôr la fiolance di anime, la glorie, lis aleancis, a lôr ur è stade dade la leç, lôr al è il cult, lôr a son lis promessis, lôr a son i patriarcjîs, di lôr al salte fûr Crist par chel che al rivuarde la sô nature umane, lui che al parone dut, che al è Diu e benedît tai secui. Ame

## **CJANT AL VANZELI**

**Mt 4,4B**

**Aleluia, aleluia**

O speri tal Signôr.

O spieti la sô peraule.

E spere l'anime mê.

**Aleluia.**



## **VANZELI**

**Mt 14, 22-33**

**Comande che o vegni ancje jo fin li di te su l'aghe.**

*A Pieri, a la comunitât, tal traviersâ la burascje de vite, ur è tocjât di navigâ te gnot, te pôre, tal isolament, te strachetât, te persecuzion, te pocje fede fin al incuintri cun Gjesù. Ma subit, cun lui, l'aiar al cessà e dut si mudà tune grande profession di fede: Tu sês propit il Fi di Diu!.*

*La liturgjie che nus presente vuê chest vanzeli e volarès che ognun di nô al podès proclamâ te sô gnot de vite la stesse veretât: Tu sês propit il Fi di Diu!.*

*Ma cheste je une rivelazion; un don, un event che nol dipent di nô.*

*Par noaltris l'impuartant al è savê che cuant che o varês patît un pôc, il Diu di ogni gracie, che us à clamâts a la sô glorie eterne in Crist, us tornarà a meti in pîts, us rinsaldarà, us darà fuarce e tignince (1 P 5, 10). Cheste e je la nestre fede; chest nus puarte la pâs e, te spiete, nus baste.*

Subit dopo al ordenà ai dissepui di spesseâ a montâ su la barcje e di lâ denant di lui su chê altre rive, intant che lui al varês mandade vie la int. Ma, finît di mandâ vie la int, al lè su la mont, fûr di man, a preâ.

Rivade gnot, al jere li di bessôl, biel che la barcje e jere cualchi mie lontane de tiere, sbalotade des ondis; che di fat al jere l'aiar contrari. Sul cricâ dal di Gjesù al vignì viers di lôr cjaminant sul mâr. I dissepui, viodintlu a cjaminâ sul mâr, a cjaparin un grant spac, scrupulant che si tratàs di un fantasma, e pe pôre a tacarin a berlâ. Ma Gjesù ur fevelà subit disint: "Fasêtsi il cûr fuart, o soi jo; no stait a vê pôre!". Alore Pieri lu preà disint: "Signôr, se tu sês propit tu, comande che o vegni ancje jo fin li di te su l'aghe". E lui: "Ven!". Alore Pieri al dismantà de barcje e al tacà a cjaminâ parsore da l'aghe lant de bande di Gjesù. Ma viodint che l'aiar al soflave masse fuart, lu gafà la pôre e, stant che al tacave a lâ sot, al berlà disint: "Signôr, salvimi!". Gjesù al spesseà a slungjâ la man, lu cjapà e i disè: "Om di pocje fede, parcè mo âstu dubitât?". Montâts su la barcje, l'aiar al cessà. Chei che a jerin su la barcje si butarin in zenoglon denant di lui disint: "Tu sês propit il Fi di Diu!".

Peraule dal Signôr

**O crôt**

**Su lis ufiertis**

Acete di bon voli, Signôr, i regâi de tô Glesie,  
che tal to boncûr tu jai âs consegnâts par che tai ufrissi,  
e cu la tô fuarce fasiju diventâ il misteri che nus salve.  
Par Crist nestri Signôr.

**Antifone a la comunion**

**Sal 147,12.14**

Gjerusalem, dai glorie al Signôr,  
cu la flôr dal forment lui ti sostente.

**O ben:**

**cf. Zn 6,51**

Il pan ch'o darai jo  
e je la mê cjar, par che il mont al vivi, al dîs il Signôr.

**Daspò de comunion**

La comunion cui tiei misteris  
che nus salvi, Signôr,  
e nus confermi te lûs de tô veretât.  
Par Crist nestri Signôr.

\* \* \*

**Sante messe e Eucaristie, rîts, preieris, cjants: Hosanna pp. 34 - 119.**

\* \* \*

**"Signôr, salvimi!". Gjesù al spesseà a slungjâ la man**

Cjamp di concentrament di Westerbork, an 1943

*Le minacce e il terrore crescono di giorno in giorno. Mi innalzo intorno alla preghiera come un muro oscuro che offra riparo, mi ritiro nella preghiera come in una cella di convento, ne esco fuori più "rccolta", concentrata e forte.*

*Questo ritirarmi nella chiusa cella della preghiera diventa per me una realtà sempre più grande e anche un fatto sempre più oggettivo.*

*Dentro di me c'è una sorgente molto profonda. E in quella sorgente c'è Dio. A volte riesco a raggiungerla, più sovente essa è coperta di pietre e sabbia: allora Dio è sepolto.*

*Allora bisogna dissotterrarlo di nuovo.*

*Mi immagino che certe persone preghino con gli occhi rivolti al cielo: esse cercano Dio fuori di sé. Ce ne sono altre che chinano il capo nascondendolo fra le mani, credo che cerchino Dio dentro di sé.*

Etty Hillesum

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*